

224
36
4

陶南邨詩卷之三



曉起



豆苗引蔓上疏籬
桐樹吹花落釣磯
老我田園間處好
故人書疏近來稀
挂巾蘿薜看雲起
沐髮滄浪待日晞
只怪平生詩癖在
形骸消瘦不勝衣

題王筠菴水邨山居二首

垂楊舊種成籬落
小徑初開近石砭
夜雨漁舟添箇箇
晴沙鷗鳥下雙雙
夢魂不到鳴珂里
卜築何須濯錦江
沽酒鱸魚從野老
高僧招隱壓新腔

南中言集 一
松杉束屋青天小猿鶴當階白晝閒木客揖人騎
虎下谿童采藥買琴還玉笙聲斷雲連席丹竈光
沉月滿關我欲排楹與隣並掬泉洗耳聽潺湲

錄宋宮人語

雲護春陰凝薄凍煙銷鑪篆帶餘馨殘花滿院鶯
聲澀細雨吹簾艸色青丹鳳不來天浩浩玉簫吹
徹淚冥冥腰肢瘦損真無幾寧使清心混濁涇

對月

客子每看湖上月秋聲漸近竹邊窗流螢綴衣夜

數箇白鶴聽琴時一雙甘旨未能娛綵服旅愁長
是對寒缸飯牛屠狗誠無媿附鳳攀龍志未降

熟食日有懷

去季今日天台路布襪青鞋捫薜蘿山鳥亂飛疎
雨至人家閉戶落花多孤燈客髮愁中改千里鄉
關夢裏過江漢悠悠爲客淚先瑩回首倍滂沱

西湖晚步題湖山堂

短策輕衫徐步穩平堤落日暮光遲郎君馬上敲
金鐙官妓船頭唱竹枝老鶴不歸和靖墓長林還

護鄂王祠吁嗟人事朝朝異山色湖光似昔時

長安市

長安市上多青樓樓下美人嬌以羞千金買笑復
何惜萬里作客還自愁勲業未成慙寶鑑英雄何
限看吳鉤百年世事如雲雨老大徒傷易白頭

九日

江城黯慘傷秋算人事艱難感恨長正苦兵戈依
遠道不堪風雨過重陽髮毛垂領蕭蕭短菊蕊盈
枝細細香妖氣天光兩冥漠將軍何日定荆襄

獨坐簡趙彥徵

豺狼猛噬據荆徐烽火連雲照玉除世上小兒皆
習戰江南何地可安居諸侯控制兵機冗濫吏誅
求國政疎獨坐小窗情思惡秋風嫋嫋正愁予

曉發松江

客裏東風促去程沙棠舟小布帆輕衝人鷗鳥雙
雙起近水桃花樹樹明故喜吳淞堪寄食不愁江
漢尚屯兵經綸事業成虛擲一寸葵心向日傾

次邵冠軍客中見寄韻

重關列戟遲行舟
小雨吹煙凝不流
時迂檄書傳
帥命數呼官酒破
詩愁江城已擊扶
搖上海宇還
期汗漫游春樹
重重雲暮合
懷人多在驛西樓

皆夢軒爲陳汝嘉賦

北窗高臥羲皇上
不比南柯太守衙
塵世蕉陰方
覆鹿山童竹裏自
敲茶黃梁旅邸空
仙枕春艸池
塘卽謝家萬事轉
頭同一幻怪來筠
管忽生花

偶成簡錢曲江

字惟善

坐看涼月上谿樓
桐葉晶熒露氣浮
戀闕近瞻天

北極懷親遙隔海
東頭寓形宇內一
身老濯足滄
浪萬里流安得神
飈駕輕轂白雲直
下卽丹丘

寄贈葉子澂

名以清京口人避兵華亭遂家焉貧而尚節義

平生不受官長罵
結屋乃在深郊居
田無二頃每
種秫日有一錢惟
買書養親上堂具
甘旨留客煮
飯挑嘉蔬憐君行
義有如此名譽豈
肯終閭閻

次謝士英韻

郊原十里非凡境
屋宇無多似灤西
新竹長來吟
徑小綠楊缺處
画橋低茶浮石鼎
兒新煮詩滿雲

箋手自題乘興看山出林麓短筇一箇影清谿
春雨初晴沈野亭見訪

九十日春渾有幾相將一半雨兼風艸堂晴旭生
虛白花徑兒童掃落紅漫喜故人來泗北更期後
夜宿山中青鞋布襪須吾輩百遍相過意未窮

次夏士良戶侯韻

竹裏茅茨白板扉興來隨意臥牛衣天籠平野前
山遠水拍危橋過客稀釣罷得魚沽酒去雨餘種
豆荷鉏婦故人卻在城南住日日清觴四坐飛

秋懷次夏停雲韻

妖氛瀕洞逼京華將畧時無李左車休唱貞元供
奉曲似聞商女後庭花職方未復江南貢使者空
乘海上查自古和邊真拙計卻令紅粉泣琵琶

送陳平仲

我居巷南子巷北同是挈家來避兵故園荆榛已
能理遠道虎豺那可行老懷作惡輒數日寒谿送
別傷離情未知後會更誰好斫鱸且醉雙銀罌

讀史次謝元素韻

長時讀史白雲西往事評來手自題亮也已亾誰
相漢單云多智國存齊百川行地終歸海五緯經
天未聚奎堪嘆洛陽宮外路銅駝荆棘夜烏啼

樂靜艸堂爲衛叔靜賦

屋繞芙蓉九疊屏日長客去掩閒庭岩花煖傍疎
簾落階艸晴分汗簡青溫火試香刪舊譜汲泉煮
茗續遺經江南定有徵賢詔太史方占處士星

次韻荅楊廉夫先生

移家正在小斜川新買黃牛學種田奏賦不騎沙

苑馬懷歸長夢浙江船窗浮爽氣青山近書染涼
陰綠樹圓樂歲未教餅有粟全資芋栗應賓筵

夜坐

披衣散髮坐南榮漏點遲遲欲二更風約沼萍雲
影淡月栖徑竹露華明石牀涼意浮珍簟寶鼎沈
烟噴玉笙世慮不關心似洗此身只覺在蓬瀛

梅花鳴

谿北谿南十萬枝洞門深鎖幾人知月香水影無
多語姑射羅浮自一奇千里喜傳春信早孤筇偏

愛夕陽遲殷勤更入坡仙詠共補辛夷別墅詩

守歲次謝高潔韻

明日五更纔是春坐深不覺漏聲頻風塵瀕洞向
今夕燈火團欒能幾人老去清霜吹髮髮愁來雙
淚落衣巾乾坤擾擾皆兵甲何處谿山着此身

機山懷古次趙廷采韻

昭侯功業在人間二俊文章若可攀西洛竟從王
穎辟秋風不遂季鷹還平原邨迴家山靜華表雲
深鶴夢閑有客艤舟來弔古空林落葉雨潏潏

長至日林泉偕雪林踰鳳岡訪友聯句次其

韻

鳳皇飛舞結青山九曲雲林第一關輕權每從谿
口去短蓑長自嶺頭還初陽消息升沈裏二老襟
懷嘯咏間此地正堪頤算景采芝底用躡商顏

催梅爲雪林作

的皜孤標隔水湄我家庭館見何遲喜迎春信無
多日莫負東風第一枝湖曲老逋魂定返羅浮仙
子夢曾期短筇立待黃昏月嗅得寒香便賦詩

代梅苔

向煖南枝趁早開讓渠獨占百花魁與時無競緘
春在感子相思索笑來吹笛且休明月底煮茶宜
傍白雲隈老子不比桃和杏直要蓼蓼羯鼓催

次景訥菴韻送廷采

傳家畱得舊青瓊旅食西州五十年老去祇知懷
故國曉來生怕送歸船丸山影落三江口丹杏花
開二月天最是東風雙語燕畱人飛過酒尊前

先照樓爲玉無瑕上人題

若木枝頭耀燭龍寅賓先與最高峰光明徧照三
千界樓閣宏開第一重舉目心徵香水海至誠膜
禮紫金容五時說法如親聽向上圓機不露鋒

經云如日初出先照高山

聽雪爲孫以貞賦

瑤池阿母教飛璫細搗冰花擁佩旌郭索行沙林
竹偃吳蠶食葉紙窗明短編清夜誰家讀柔櫓寒
谿遠處明閉戶先生俄側耳松聲沸起煮茶鐺

八月十五夜玩月次韻

高捲湘簾看明月一年今夜十分嘉露華清灑玉
豪兔林影還浮金背墓太液池臺當更好廣寒城
府望非賒據牀老子婆娑在嘯咏歡娛孰有涯

次胡別駕韻寄李儀曹至剛

皇帝徵除贊禮曹御爐烟染越羅袍太微垂象郎
星近仙步趨朝地位高夙夜寅清宗秩祀儀文開
朗列英髦嗟余白髮懷思日孤鶴長鳴在九臬

小園卽事次胡廣文若思韻

日長童僕理蔬畦官舍如同隱者栖新水方塘魚

在藻落花小雨燕銜泥栝盤畱客兒能奉琴冊娛
心手自攜滿紙文章新灑翰人人爭道外孫壘

緋桃次韻同前

凝脂近水騁芳姿劉阮從來見事遲血寫妖猩衣

燦爛用紅衣燄融烈火錦昌披用石曼卿事壽同西母

還丹日笑倚東風醉酒時絕勝渡江顏色淺英名

久入彥謙房詩

萬竹林爲鶴砂于廷立賦

渭川壤地栽千畝海上雲林長萬竿晉室一時人

曠達爾家三徑日平安琅玕響激秋聲早翡翠陰
團雨氣寒裏茗敲門容借看清風吟嘯對檀欒

九日次韻

今年九日還爲客朋舊壺觴興趣同雁影江頭清
淺處龍山天際有無中黃花細吐香堪采白髮高
歌氣不充醉把茱萸懷弟妹異鄉飄泊已成翁

張林泉九日寄詩次韻荅之

畊田鑿井水南郊嬾性從來謝拔茅艸檄未能行
虎落濡毫敢望立螭坳菊萸並進重陽節萍水相

親遠道交歲歲茲辰動懷想若爲對飲共山肴

新寒寫懷次韻

世故漫漫混渭涇九山高枕臥雲屏攤書霧拂雙
眸瑩攬鏡霜欺兩鬢青啼燕淒涼誰復顧吟蛩哀
怨不堪聽秋風落木茅茨破坐右高縣陋室銘

壬申十二月廿九日林泉抱拙伯仲萬山別

駕同宿三味軒得何字

歲晏高朋忽我過諸生尊俎罄歡歌老來短髮因
愁改醉後衰顏爲酒酡燈影未隨雲影淡漏聲不

似雨聲多明朝約共尋梅去屐齒泥深可奈何

立春次韻

曆降靈臺一歲新氣調玉燭萬方春候灰浮動輕
於雪臘酒傾來白似銀花勝亂簪人鬪巧菜盤新
簇齒生津尋芳早晚如相約便整肩輿繼後塵

雨窗會飲分韻得雞字

南畝躬畊水一犁夜來風雨正淒迷華筵盛集書
相拉白絹斜封手自題賓客不分牀上下盃盤盡
出玉東西太平深野宜歡樂還憶都門曉聽雞

和琴清萬山五日雨窓酌酒賦詩韻

睡餘閒把離騷讀白髮醒然一老身五采誰纏長
命縷赤符不上小烏巾蘭湯滑凝芳華冽丹白香
融藥艸新簾卷琴清軒外雨蒲觴酌客更情親

夏原舟寄詩求謨其先子墓銘次韻荅之

男兒不必嘆流離治世麒麟可繫羈好句自堪橫
槩賦壯懷莫爲聽琴悲迢迢遠道江南夢念念雙
親壟上碑此日勒銘當不愧行藏顛末我曾知

贈良介菴上人

開士傳來竺國鐙
驀然悟道在聞聲
鯨音寶梵岩花落
鑪篆蒲團海月生
靜掃六塵無染着
要觀一性本圓明
何時借我袈裟地
試把宗乘與細評

化城寺悟本心上人有軒修竹中今寺與軒

幻爲劫灰瓶錫游方自號竹軒志不忘也

此君勁節保平安
壞衲幽居寄嬾殘
一榻清風敷具坐
四窗涼雨卷簾看
梵餘瑟瑟笙簫
荅定起沈沈翡翠寒
長作化城安隱想
眼前隨處碧琅玕

送潘貢士魯與

東風拂曙泮林春
行李觀光上國賓
歲貢成材雖有格
且評雅望妙無倫
帆浮翠縠江波灩
馬控青絲柳色新
此去辟雍天只尺
早持鈞軸見經綸

送人才殷惟中

春水綠波春艸碧
春風一櫂發江城
到京便入人
才選薦剡連排父老名
朋舊稱揚多義舉
衣冠惜別重交情
此行喜遂平生志
簪紱榮身感聖明

甲戌元日次韻

守歲鑪邊燭尚明
家家簫鼓雜鐘聲
紫霄散彩晨

光發元日開祥淑氣生萬丈赤城懷復眺千絲白
髮喜還驚老來但博身強健詩酒朋游慰客情

送呂仲徵知縣之官武平

明經擢第下金鑿題賜宮羅墨未乾早歲喜誦尊
主學長才先試牧民官銀章朱紱三千里白舫青
簾五百灘在汀州一縣花開琴調古佇聽趣召入朝
端

題顏近仁清風卷

近仁先朝進士能寫竹

高棟曾軒頰澗阿此君挺挺翠駢羅寫真縑素襟

期合相與冰霜節操多鸞牡遶歸周甫誦蓬萊何
處玉川歌門前應用開三徑自有故人時一過

題朱文儀松軒清賞卷

五鬣離離翠作行四簷奕奕住中央籤栽象齒尊
經史帖護芸暉寶晉唐點易研朱朝滴露題詩握
管晝焚香開庭亦有風來處不及君家意味長

贈樂安居士張彥載

治世優游賦考槃葛衣藜杖筍皮冠清谿一曲居
常樂紅日三竿睡正安花外雨窗篔簹醞竹深風

鼎滃龍團到頭渾是清閒福笑引兒孫種合歡

題王孟京先生采芝生卷

高風千古仰商顏自喜幽栖近九山短鋪每從層
巘陟頃筐長帶亂雲還晴霞煖護金莖紫曉露香
融玉朶殷辟穀延年端藉此飄然行筮列仙班

賞牡丹次蕭古齋韻

萬卉千葩推第一天然國色謝鉛華沈香亭對殊
堪匹金帶圍成未足誇宿露煖風滋絳蠟曲闌輕
幄障晴霞尊疊燕賞加題品格調清新是作家

次韻送張處善歸楓谿

慨世浮名散若烟喜君浩氣直如弦兵戈避地三
江曲湖海論交廿載前夜雨慢懷揚子宅早潮催
發米家船楓林渺渺晴雲外此去添予別緒牽

代賦借鶴

香靄瑤壇恭藏事帝真幢節控神颺朱陵紫府傳
丹檢白鶴青鸞下碧霄翅影亂隨旛影颺吭音渾
與玉音調衆眸瞻睹同稱讚孰與仙禽不可招

中秋對月有感

我室沾煩月照幃今年此夕認清輝芳時一去無
絲返皓首同歸與願違譙漏聲傳人寂歷胡牀影
蠹露霏微碧霄如水連銀漢好洗浮生萬事非

又次冰雪翁韻

碧空湛湛露華清萬籟沈沈一鑑明節序俄驚今
夕是光陰只使老懷驚柝盤小酌雙瓶盡賓主高
談四坐傾童子煮茶來報說蓮花漏刻已三更

送萬用謙歸豫章

阿兄司臬蒞松城令弟辭家賦遠行吳楚相望縈

別恨填簾迭奏藹親情山頭曉月長亭小江上秋
風一舸輕楊柳條疎不堪折頻頻勸酒待潮生

題翟景泉空空室

名蒙

都門此日寄高蹤僦屋通衢豈諱窮四壁蕭然無
長物八窗豁處有清風居安養拙遠廬若絕念忘
形幻泡同方寸虛靈元不昧漫從釋部話空空

雪中偶成次書莊叟韻

瑤池阿母試鸞刀剪碎馮夷白戰袍琪樹千林清
可攬玉厓萬丈勢彌高越箋題句披蟬翼建盞行

茶沃兔豪却笑堆成獅子樣街頭便可怖兒曹

和山翁寒夜竹所宴集韻

西湖雪裏喚相宜欲約重游未可期歲月恩恩多
契濶栝盤艸艸足委蛇金荷燒燭光逾粲石鼎聯
詩句益奇老子婆娑嗟莫預買花載酒不為遲

相宜

船名

立春次韻

迎春餞臘此辰兼暢飲何愁酒價添春菜青青敷
甲拆枯荻短短綻包尖銀旛闢巧應須賜玉燭調

和不用占晴日煖風春信早千紅萬紫競穠纖

除夜次韻

歲律纔圓已貳程滿家守餞歷深更驅儼隊列粃
盆艷爆竹殼揚玉漏清糗車船窮鬼事栝盤燈
火異鄉情徘徊不覺東方白簫鼓喧闐到處鳴

丙子元日次韻

帝車揭柄夜司寅鳳曆頒季氣象新元日舒長開
正始東風扇煖逗陽春剡桃作版神如在列炬為
城迹已陳笑把屠蘇隨後飲南邨我是老天民

算春分韻得青字

輕寒輕煖夜來晴
鵲鷦催畊語不停
清沼滿浮春水碧
綠陰濃帶遠山青
無雙美醞玻璃盃
第一名花翡翠屏
欲駐芳輪無上策
恩恩離思短長亭

水西畊隱爲林彥祥賦

西疇膺膺水泠泠
小結茅茨也自清
白蠹簡編風外讀
烏犍蓑笠雨中畊
休官彭澤惟陶令
行義安豐有董生
九月築塲禾稼熟
獻羔祭韭樂昇平

次韻自述

飄零江海半生多
年少疎狂老益磨
柳拂簷牙兒手種
落黏屐齒客來過
雨窗吟苦賡詩債
茗盃香清遣睡魔
亦欲躬耕南畝上
飯牛閒暇織農蓑

九日次韻

重陽佳節古今同
老我淒涼思不窮
兩浙東西淹歲月
一身南北類萍蓬
登龍人在銷沈外
戲馬臺荒感慨中
醉把茱萸懷弟妹
不知烏帽落西風

平湖爲山陰鏡上人賦

萬頃平湖枕越城
短篷如在畫圖行
波浮霜鑑金

輝瑩山擁水壺玉氣清翡翠蘭苕酣淨綠天光雲
影照空明知章一曲應分得用作沙門字與名

次曹雪林見寄韻

告老歸來鬢已秋山中廬墓境深幽田園已遂陶
彭澤鄉里爭稱馬少遊戲彩庭前思遠道解纓風
外濯清流新詩題寄渾難和筆力高於五鳳樓

千山訪曹雪林劉深雲周雲鳴看菊花雲莊

有詩次其韻

千山盤曲帶諸峰與客尋幽向此中谿色秋同天

色淨籬花曉裊露花濃雲林泉石清深處人物衣
冠太古風酌酒賦詩忘路遠放船歸晚意無窮

並頭鶴頂紅菊次雲樵韻

翩躚籬下合歡叢駢首昂昂沁淺紅湘浦淚沾仙
羽若喬家醉嗅晚香同秋宵併作繁華夢春色勻
光隱逸風自昔栽培無此本丹鉛圖寫待良工

黃白二色菊

一本花敷二樣芳試稽別譜異尋常東籬夜結金
銀氣彭澤神游坤兌方正色半隨霜露改晚香渾

似蝶蜂忙蠟葩月朶爭輝潔漁隱詩篇久播揚清周

真詞蝶粉蜂黃苕溪
渙隱有黃白菊詩

次林泉韻簡雲莊

慈親堂上笑開顏画舫歸來落照間一刻分疏投
栢府諸郎迎候出林關風塵涉世情當適鷗鳥忘
機息自閒開歲元宵無幾日入城好約看燈山

丁丑元日分韻得生字

土牛餞臘三元正玉燭調和四海清老眼細看新
歲曆白頭偏動故鄉情人家競寫宜春帖宰相寧

無列火城圖軸高縣鍾進士怪精也復可憐生

謁貞烈廟

元封英義武
惠正應王

義興縣裏長橋外祠宇巍峩枕碧虛華袞端居英
義像穹碑深刻右軍書斬蛟射虎傳今昔盡孝全
忠耀里閭一櫂經過來致謁石香爐畔整冠裾

過石臼湖

四圍漲塞中流淺一日風帆百里程勢敵洞庭天
所設形侔石臼古來名烏犍黑豕千群亂碧艸黃
沙萬頃平幾處空林皆可画扣舷吟咏豁高情

三月朔日入都門

欣欣灌木衛圓丘
滾滾長江控上游
虎踞龍蟠真聖主
天開地設古神州
五雲宮殿參差起
萬國梯航遠近柔
何幸布衣膺寵命
擬隨仙仗覲前旒

二日早朝

雞人三唱送殘更
禁鼓寥寥日未升
白玉構橋聯五仗
黃金題榜耀觚稜
班傳臚句朝儀肅
樂奏簫韶旦氣澄
黼坐正中天只尺
叩頭丹陛益凌兢

到家

頭白衰年一病身
輕裝來往倏三旬
五城街市經行遍
數畝田園入望頻
芳艸落花吳苑夕
短帆輕槳澱湖春
到家菊茂秧田綠
老作皇明治世民

過鳳山錦溪橋

錦谿橋下水平谿
楊柳條長拂岸齊
參政張瑄寶坊
歸幻劫右丞徐義先壟可
悲悽漁船檜楫雙雙短
酒店茅簷處處低
市井荒涼風景異
老鴉啼過亂雲西

西

白醉樓爲范文鉉賦

目眩金鑼唐高素道遙館冬月初出銘云墮指折膠夢想曝背金鑼騰空映簷白醉日

出初簷闌凜冽氣全蘇心情酣樂非因酌體骨融

和似欲扶西閣吟成唐杜老詩集有西閣曝背篇寒時作息

宋田夫負暄事見列子幕天席地從吾意兀兀陶陶一念

無

送王思廣還常德衛各弘

玉立長身意氣多相逢忽在鳳山阿晉朝人物王文度漢代將軍馬伏波鍬甲枕戈曾報效錦衣傳檄謾娑娑東風二月桃源路歸騎翩翩奈爾何

蓮月軒在華亭東林寺為矩菴方上人賦

鑿沼栽蓮半畝強開軒敷席坐端相從來水月真靈境化出匡廬古道場兔影淡籠銀橐淨水輪清碾玉簪香要知影色皆為妄本性圓明意味長寺正

殿奉觀音大士

寒碧軒為玉岩璉上人賦

花惟蒼荀樹旃檀地位清高眼界寬雲彩半分冰鑑碧天光倒浸露壺寒靜凭曲檻前凡趣宴坐曾軒習止觀本性空明猶湛水未教風外起波瀾

洪武三十一年閏五月初十日亥時 大行
皇帝崩十六日 皇太孫即位十八日大
赦天下改明年為建文感而恭賦

先帝消搖游碧落 神孫端拱坐明堂 九重統
握乾坤大萬國恩沾雨露香動植飛潛滋德色都
俞吁咈慶明良老臣舞抃南邨底笑對兒孫兩鬢
蒼

閱畊 陳處士
號也

小築瑤谿水北莊閱畊杖屨日徜徉父菑子播知

無逸妻饁夫耘敬有常好雨三時禾毓秀涼風七
月稻吹香相逢田峻談農事西陌東阡幾夕陽

中秋夜對月

八月平分秋正中飄香桂子落長空十分圓魄年
年好一道寒光處處同清唳忽來蓬島鶴亂吟不
斷露莎蟲南邨未釀南樓在治世琴尊屬老翁

乙卯元日

鳳曆新頒紀建文初元正旦上晴暎 一人聖德
敷皇極萬物光輝沐湛恩家世傳來書滿案賓朋

致賀酒盈尊太平如此誠難值只願年年子又孫
題唐涿州橫雲艸堂

三泖移居屋幾楹青山一帶與雲橫翠芬落几琴
聲潤玉氣浮階鶴夢清剖竹專城施政教縣車故
里養尊榮杖藜莫厭相過數好付兒郎管送迎

城市山林爲孫子華賦

我家住近古城陰隨分生涯豈用心佳菊移栽秋
粲粲修篁羅植晝森森溝池環匝泉源活門巷幽
閒徑術深祇爲長年耽野趣旁人都道是山林

送上海知縣司公守道赴召

妙揀憲臣來作宰文星天上照雲間薦賢名奏麒
麟殿戀關心馳虎豹關駐轂邑門畱犢去借船浦
口載書還東南賦稅民罷病荅問應知動 聖顏
送人才何公遠

朝端奉旨舉賢才使者馳書海上來琴冊緘封榮
組紱衣冠飲餞列尊罍五城樓閣雲烟繞萬國山
河錦繡開 聖主臨軒求治切奏陳利病莫遲回
題靖州衛陳指揮凌雲堂

指麾訓練渠陽衛奕奕名堂結構全五彩翬飛昭
武烈八窗洞啟樹機權拋書草檄風生席握槊談
兵月滿天他日論功須第一凌雲發軔上凌烟

次胡萬山韻荅陳祠部

坐樹疏梅試一吟紛紛霽雪落長林
嶰泉石鼎烹山茗溫火金鳧熱水沈
幽意漫隨寒日淡故人遙住白雲深
試看題寄新詩句珠玉篇篇有賞音

題沈宗文竹梧軒

竹梧竝植近軒墀一榻清風日自怡
玉立娟娟水

雪操翠融挺挺鳳皇枝昌黎喻勒王孫誌工部吟
題省署詩琴瑟斲成笙管截明廷九奏致雍熙

送俞知縣嘉言之魯山

皇朝進士聲華重藩邸清曹正列班有旨召
除分宰出叩頭請告送親還疏章切媿長沙傳組
紱行之古魯山百里塗謠稱善治傳家定達五雲
間

送友之官

握手河梁酒一卮若爲會合在何時前旌剡剡催

行邁疏柳蕭蕭縮別離明月圓虧千里共尺書往
復半年期願言清慎修吾職早晚高遷侍 玉墀

送李給事中行恕服闋之京師

名敬

給事 先皇內六曹緝熙九法獨稱勞音苦堊

塊

室終縑制旌旆蘭舟試錦袍玉筍聯班黃道直宮
花簇仗紫垣高清朝事業光千古黼黻鋪張屬俊
髦

五日次萬山韻

奪標競渡快輕狂憶昔游觀力尚強艾穎離離供

巧製榴花朵朵殿群芳辟兵人佩靈符小弔古江
沈角黍香曉起画梁雙語燕似知節序說興亾

景辰張先生較文福建歸林公崇高画閩溪

放櫂圖賦詩其上以餞因次韻就題

一櫂閩溪下瀨船千巖萬壑路勾連榕陰處處浮
嵐外杜宇聲聲落照邊考試來臨多士上官游向
在十年前故人分手難為別寫得雲山上蜀牋

松齋為玉峰秀上人賦

上人遠自海東來為愛青松到處栽花落石牀閒

不埽聲和天籟定初回折將席上為談柄大明法師事
 畱向山中具法材幾欲裹茶林下煮高齋賦咏六
 幽哉

鍊簫為張以道散人賦

冶師百鍊昆吾刀范出錚錚七竅簫把弄豈侔龍
 躍琯奏成好列鳳儀韶清風赤壁三千頃明月揚
 州廿四橋海上散人攜作伴較渠思致我猶饒

題許彥清松鶴軒

奕奕高軒結構成種松養鶴遂間情翠濤翻處鳴

逾遠金粉飛時步覺輕衣溼長防清露滴枝蟠不
 怕舊巢傾歲蕤五粒真堪啖相與長年已訂盟

臘月廿七日雪

立春三日雪花稠作陣隨風卒未休屋宇高低銀
 蓋覆郊原遠近玉雕鏤將軍好問平吳策高士誰
 乘訪戴舟九萬車夫多凍餒定應未到濟寧州十

月松江府起差民丁九萬名赴濟寧陸運糧米九萬石至德州軍前

送教諭沙允恭赴禮部試易經

袖行薦剡謁南宮白鶴長鳴蕙帳空花氣春濃薰

錦旆柳絲風軟拂青驄世承雨露詩書澤筆補陰
陽造化功應試歸來須一月離筵勸酒莫怱怱

送夏西疇還寧夏

歸來已是十年過行李蕭蕭兩鬢皤紫塞冰霜還
部曲清秋風雨去關河潮浮短棹征途遠酒盡離
觴別恨多從此音書應更少斷腸分手淚滂沱

送道士葉道心游武當

均陽雄鎮武當山金闕宏開縹緲間龍虎風雲環
紫極龜蛇水火閱玄關杖藜達道秋行役幢節層

壇曉綴班此地消搖酬夙願丹成九轉未知還

送陳子章赴王家灤館所

多士畱連醉別觴琴書一棹水花涼郊原不異東
西讓主客何分上下牀白髮垂垂勞授業青衿濟
濟快升堂弦歌聲輟閒情好定有新詩爲我將

送戴叔溫赴京

堂堂廷尉重詳刑幕下賢郎案牘清奔訃宅憂喪
有制釋衰還吉禮無傾船從三泖湖頭發路向丹
陽郭裏行此去功名渾好在秋風買酒叙離情

送廷采還黃鶴山中三首

廷采宋宗室諸孫世家越之姚江從外舅
氏黃鶴翁讀書武林山中其爲人趣操高
尚進止雍閒博涉書傳外喜吟咏尤善画
山水竹石擅一時之美大抵胸中所養不
凡見諸筆下者自然超絕今年春復游淞
江得相與往復兩月許忽懷故山猿鶴翩
然賦歸日抵暮來告別燈下書此以餞兩
眼昏花殊愧草率

木葉蕭蕭小雨零西風鼓櫂晚潮生江山形勝歸
圖寫今古詩篇付品評乘興漫窮登眺樂懷人不
盡別離情蕙帷黃鶴應無恙此日歸來思益清
黃鶴山中夙著聲丹青文學有師承前身直是王
摩詰佳句還宗杜少陵溪上曉來烟似幄江南春
盡雨如澠扁舟催發輕離別作惡情懷老不勝
霜落松江水氣清風前一舸白鷗輕十年已是三
番別兩地都來幾日程鬢髮蕭蕭憐我老栢盤故
故惜親情開春有約重攜手不在吳山定越城

送邵升遠應聘之京

朝廷歲歲徵遺逸奉詔蒐羅在有司
深巷窮經端可樂諸侯勸駕不容辭
天威只尺黃金闕虎拜三千白玉墀
清問從容及民瘼東南黎庶洽雍熙

送張有秩御史制閔如京師

五采冲霄見羽儀龍蛇研影快清時
報親讀禮三年畢事主揚名四海知
獬廌班中曾抗疏鳳皇臺上好題詩
滄江画鷁潮催發不盡離愁酒一卮

送錢敬叔歲貢赴禮部

名讓

隴頭不待鶴書招勸駕賓筵禮數饒
芹泮泳游才孔雋鵬程騫翥氣彌高
九山霽色浮江渚十日春風拂柳條
一曲驪駒頻喚酒離愁楚楚政難消

送薛應翔人才之京

沿牒喜從鄉老薦画船搥鼓發江城
馬空冀北標雄逸鳳起河東仰
聖明萬國朝天黃道直五雲擁日泰階平
旌旗研影三千字朱紱銀章被寵榮

送徐思勉應聘書 誥敕

寒谿鼓櫂赴弓招雪點輕裝錦作袍
日侍殿庭沾

聖渥職書 綸綍筵清曹鸞回鳳舞金花軸鍊畫
銀鈎玉兔毫九萬鵬程從此始登瀛視艸步彌高

送曹士望應聘書 誥敕

丹詔徵賢上玉京艸堂動采樂文明一經夙繼春
秋學三事難忘仕宦情佶曲聳牙周誥古森嚴開
朗晉書精八鑿臨幸西清日奏對鋪張屬俊英

送貢上蔣時俊之京 名彥英

聖世崇文治教隆歲徵多士赴南宮賢關上舍高
升日泮水西齋靜學功夜雨寄懷三徑竹春風得

意五花驄臨岐握手難爲別尊酒何時笑語同

送張宗武

宗武應聘入京余以師生之義偕親友四
五人送至姑蘇別洪武巳巳正月四日晚
解纜明日大雪深二尺許又明日雪霽過
澱山湖賦此以簡同舟之能賦者

小舟衝雪向來曾如此湖山喜快晴萬頃淵渟雲
浩渺一峰危立玉崢嶸寒生毳褐清尊益色映烏
紗白髮明只怕閨門明日到春風惱亂別離情

贈龜卜金谷祥

周官太卜寶神龜旦旦梁黃黃絹裹梁澡被之造

竈灼鑽研恭按式謀為杌隍用稽疑一人能了三

人識諸兆還從四兆推獨有谷陽金處士傳家術

業遂於斯

志喜

洪武庚午五月至六月彌月不雨松江命

方士陸雲澗建法壇仙鶴觀禱焉余所居

長泖上去城北三十餘里地勢高亢河流

涸禾稼悴民惶惶無所措十四日未申之

交雷電以風急雨隨至十八日又雨潮汐

復大作涸者溢悴者榮因以志喜問城中

人雖涓滴無有也

翹首甘霖久不霑火雲赤日勢如燄桔槔聲斷川

流竭穉稷苗枯暑氣炎迅電掣霆誅厲魃蒼龍飲

海挾飛廉四郊滿慰三農意從此豐年可預占

次天淵韻二首

辭親祝髮已真休孰肯將心憶故丘禪榻熏爐從

早夜雲筇雨笠幾春秋朝廷制下催歸籍羅剎江
橫去買舟公案參餘千七百明年試罷復來游

風采飄飄若貫休相逢猶憶在丹丘多師妙闡三
乘法老我愁添兩鬢秋蒼苔清芬浮雅製鳳皇空

翠落歸舟到鄞應是無多月又向金陵賦遠游

上人寄單淞之昭慶寺寺有繡經室曰蒼苔林鳳皇山在寺之東北隅

邵弘遠用陳祠部韻賦詩見寄和以荅之

故鄉遙隔一谿青眼底湖山興趣增菊本賸栽多
按譜魚秧新種未容曾舊藏書富縣籤度重慶堂

高衣采登未卜何時能往訪懷人長望泖雲層

青出於藍分外青承傳世學喜加增濟川舟具帆

檣柁漁海人資網罟罾豹管一斑慙淺見天門八

翼會高登老余待盡南邨裏屋上添茅歲歲層

送鄉貢進士錢宗善餘慶誤時緯仲文誤克

潛綱赴京會試

一從鼓篋見奇才高步蟾宮折桂來聖世設科羅

俊彥春闈較藝奪高魁柳陰繫馬深杯勸江上揚

帆急鼓催此去定知逢慶會奎光昨日燭三台

新水生時一權輕吳淞江上雨初晴會知富貴能
相逼決取科名在此行龍虎榜高濃淡墨鳳皇臺
近古今情璫林宴後還登覽萬國山河共帝京
東風攬轡過長干楊柳青絲拂綉鞍塲屋競誇攀
桂手文章深種主司官泥金寫帖緘書寄燒尾開
筵共客歡玉陛臚傳當第一班催鷓鷯立朝端

和張賓暘西疇汎舟韻二首

平疇積水欲成湖未有良工寫作圖晴日曛曛收
宿靄暖風和暢拂春蕪綠楊紅杏韶華麗白舫青

簾主客娛老子放懷成痛飲醉循埽路日西晡
潦水茫茫接澗湖人家如在輞川圖日明練色涵
青嶂風細鱗紋漾綠蕪打鼓踏車農事冗放船攜
酒客情娛飲闌同叩鄰姬戶啜茗聽謳直至晡

故社士姚文實輓詩

啟祠抱主鄰炎熄剗股煎糜父病痊一代衣冠今
社士百年詩酒古神仙高風雅入名人傳孝行宜
登太史編欲訪清游已陳迹空山短日思凄然

朝廷

賜爵社士年七十三卒
國子學錄錢燾作傳

哭趙廷采儼

餘姚江上故王孫黃鶴山中講世昏冰玉聲華過
衛樂丹青事業在乾坤半途忍棄妻兒面一念應
懷父母恩泚筆爲修潛德傳無多老淚只銷魂

悼周通玄鍊師

史君延致禱雩壇電掣霆流起劍端祕訣曾傳蒼
玉檢長生未服紫金丹月升海嶠猿啼切露溼松
巢鶴夢寒雲屋秋扇風落木似聞環珮尚珊珊

因祈

雨勞神得疾迤邐而亡
洪武丁卯八月十六日

臘月癸亥立春喜晴三首

一冬淫雨動彌旬今日初晴值立春八表蕩除陰
沴盡萬民瞻睹太陽新土牛綵仗寒猶沍蔬甲雕
盤綠未勻林下老翁增壽紀宮花不上小烏巾
開歲三元尚一旬東城簫鼓已迎春辛盤切出絲
絲細花勝簪來朶朶新柳眼蹙金猶淺嫩梅腮傅
粉已輕勻臘醅缸面浮香螿不負吾家漉酒巾

霖潦相仍幾浹旬和風麗日逗香春龍精戒旦陽
交泰 天子崇文曆換新檻外柳高金縷弱庭前

艸短翠茸勻老夫還怕餘寒在煖耳難除白氎巾
已巳七夕立秋次胡萬山韻

頭童齒豁髮毛衰老大徒添宋玉悲天上雙星應
有約人間一葉似知時綵樓香滿涼生早銀漢橋
橫火度遲此日報秋端罕遇呼兒捉筆和新詩

白露日桂花開次張一高韻

池上曾軒日夜開天垂銀漢洗浮埃岩花初見丹
英吐節候新交白露來細細古香吹小榻灑灑清
氣落深盃蟾宮此夕知何夕老子神游不用猜

洪武庚午正月七日雪

東皇在御未班春滕六呈祥景物新一夜花明夜
栗冽九山玉潔曉精神清浮剡曲懷思權淨洗邊
疆戰伐塵百穀有秋端可望艸堂紀詠屬詩人

十日喜晴

九日春霖曉忽晴鶉鴉喚婦鳥和鳴麥畦水漫人
疏濬梅驛泥融客問程景象從今還好在江山依
舊可憐生待看三五燒燈夜簫鼓聲中樂太平

七月廿四日喜雨口號

鑠石流金暑肆威
椶聲響荅稻將疲
天濡霈澤三時久
水漫枯疇二寸奇
雨玉雨珠那可濟
維糜維芑實堪期
黃童白叟爭稱道
太守虔誠爲我祈

八月初二日喜雨次林秉彝韻

水涸田枯若漏瓢
桔槔聲動徹層霄
滂沱雨澤驅炎熯
決滂潢汙混海潮
今歲定期秋稔熟
前邨已救稻枯焦
農人鼓腹齊歡躍
管有糧儲奉聖朝

十一月廿七日雪賦禁體詩一首明日小寒

九冥裁剪密還稀
驢背旗亭索酒時
刻水懷人乘

逸興梁園授簡騁
妍詞小寒紀節欣
相遇瑞兆占
季定可期莫塑獅
兒供一笑埽來煮茗快幽思

七月十四日書事

雲靄冥迷風暴烈
雷霆擊薄雨滂沱
十圍大樹相隨壓
百丈神龍競逐過
潢潦驟增疑漫海
溪流直立似縣河
天威未霽誠當懼
冠服兢兢念靡它

南邨詩集卷之三

終

